



PROGRAM PODRŠKE MARGINALIZIRANIM GRUPAMA (PPMG)

FEBRUAR 2017.

POČETKOM MARTA U TUZLI SA RADOM POČINJE SERVIS CENTAR ZA PODRŠKU PORODICAMA DJECE I OSOBA SA POTEŠKOĆAMA U RAZVOJU



U februaru je potpisan sporazum o uspostavljanju Servis centra za podršku porodicama djece i osoba sa poteškoćama u razvoju u Tuzli. Sporazum o uspostavljanju Servis centra potpisali su Jasmin Bešić, direktor USAID-ovog Programa podrške marginaliziranim grupama i Šefika Maketić, direktorica Udruženja za ljudska prava i socijalnu inkluziju, a besplatne usluge Centra koristit će više od 70 porodica djece i osoba sa invaliditetom i smetnjama u razvoju sa područja Tuzlanskog kantona.

“Servis centar bit će prostor za cijelu porodicu, jer

koliko je važno raditi sa djecom sa poteškoćama u razvoju, toliko je bitno i pružiti podršku porodici djece. Ono što možemo obećati je da će vrata Centra biti otvorena za sve kojima je pomoć potrebna.” – poručila je Šefika Maketić, direktorica Udruženja za ljudska prava i socijalnu inkluziju.

Centar će za djecu sa poteškoćama u razvoju osigurati boravak od četiri sata dnevno, a tokom kojeg će im na raspolaganju biti psiholozi, defektolozi i socijalni radnici. Svako dijete imat će podršku zasnovanu na procjeni razvojnih sposobnosti i potreba, a aktivnosti Servis centra će uključivati individualni rad sa djecom, kreativne radionice, inkluzivne radionice, muzikoterapiju, do će za porodice djece i osoba sa poteškoćama u razvoju bit će osigurana pravna pomoć, savjetovanje, te pomoć u kriznim situacijama.

“Zadovoljstvo je podržati rad Centra koji brine o djeci sa poteškoćama u razvoju i njihovim porodicama, ali i organizacije koje brinu o ovoj populaciji. Otvaranje ovog Centra značit će podršku porodicama sa područja cijelog Tuzlanskog kantona.”- naglasio je Jasmin Bešić, direktor USAID-ovog Programa podrške marginaliziranim grupama.

Servis centar za cilj ima pružiti podršku roditeljima djeteta s poteškoćama, djeci s poteškoćama, te svim ostalim članovima porodice.

Servis centar bit će otvoren početi početkom marta 2017. godine.

SADRŽAJ

Početkom marta u Tuzli sa radom počinje Servis centar za podršku porodicama djece i osoba sa poteškoćama u razvoju	1
90.000 KM za pokretanje i razvoj biznisa žena u Opštini Teslić	2
Samostalnim stanovanjem do kvalitetnijeg života osoba sa intelektualnim poteškoćama	2
Više od 500 učenika/ca pohađalo radionice prevencije trgovine ljudima	3
Kako bankarske usluge učiniti pristupačnijim osobama sa invaliditetom?	3
Završen trening o temi Pravne i organizacijske strukture	4



USAID
OD AMERIČKOG NARODA

Otvaranje Servis centra koji će osigurati besplatnu podršku porodicama djece i osoba sa poteškoćama u razvoju, sa 50.000 KM podržao je USAID-ov Program podrške marginaliziranim grupama (USAID/PPMG), a inicijator osnivanja je Udruženje za ljudska prava i socijalnu inkluziju (Socl) iz Tuzle.

Udruženje za ljudska prava i socijalnu inkluziju (Socl) brine o osobama koje nisu dovoljno socijalno uključene, te im pomaže da ostvare svoj puni potencijal.

90.000 KM ZA POKRETANJE I RAZVOJ BIZNISA ŽENA U OPŠTINI TESLIĆ



Fond za podršku razvoju biznisa marginaliziranih grupa žena u februaru je predstavljen u okviru održavanja Dana otvorenih vrata Opštine Teslić.

Fond za podršku razvoju biznisa marginaliziranih grupa žena podržao je USAID-ov Program podrške marginaliziranim grupama u saradnji sa još osam jedinica lokalne samouprave.

Kroz Fond će biti pružena podrška za pokretanje i razvoj biznisa ženama žrtvama nasilja, ženama s invaliditetom, majkama osoba s invaliditetom, te nezaposlenim mladim ženama, a Javni poziv za finansiranje biznisa dostupan je od 24. februara 2017. godine.

Bit će održane i dvije obuke koje trebaju poslužiti zainteresiranim korisnicama kao pomoć u popunjavanju prijavnog obrasca.



Predstavnica USAID-ovog Programa podrške marginaliziranim grupama (USAID/PPMG) tokom predstavljanja Fonda osvrnula se i na druge aktivnosti koje se provode u sklopu Programa (USAID/PPMG), te važnost samozapošljavanja i osnaživanja uloge žene u bh. društvu.

Događaju su prisustvovali i predstavnici Službe za zapošljavanje Opštine Teslić, Centra za socijalni rad Opštine Teslić, udruženja građana koja djeluju na području Teslića, a koja se bave pitanjima marginaliziranih grupa, te predstavnici drugih socijalnih partnera. Za Fond za podršku marginaliziranih grupa žena osigurana su sredstva od oko 700.000 konvertibilnih maraka, a ukupni fond za Opštinu Teslić je 90.000 KM.

SAMOSTALNIM STANOVANJEM DO KVALITETNIJEG ŽIVOTA OSOBA SA INTELEKTUALNIM POTEŠKOĆAMA

U Hercegovačko-neretvanskom kantonu već sedam godina realizuje se inicijativa samostalnog stanovanja osoba sa intelektualnim poteškoćama, a s ciljem osiguravanja kvalitetnijeg života za ovu populaciju. Stanovanje uz podršku u lokalnoj zajednici ovim mladim ljudima omogućava da žive život dostojan čovjeka i jeftiniji način zbrinjavanja osoba sa intelektualnim poteškoćama, međutim, organizacije koje rade na provođenju ovog programa već neko vrijeme se bore s održivošću.

Funkcioniranje mehanizma stambenog zbrinjavanja osoba sa intelektualnim poteškoćama bila je tema i sastanka predstavnika USAID-ovog Programa podrške



USAID
OD AMERIČKOG NARODA

marginaliziranim grupama (USAID/PPMG) s Goranom Osenicom, ministrom zdravstva, rada i socijalne zaštite Hercegovačko-neretvanskog kantona, a sastanku je prisustvovala i Erna Kotlo, predstavnica Udruženja roditelja i prijatelja osoba s posebnim potrebama „Sunce“, koje je dobilo podršku Programa (USAID/PPMG) za razvoj sistema koji omogućava osobama s invaliditetom da ostvare svoje pravo na odabir mjesta stanovanja, humaniji život i bolji kvalitet života u lokalnoj zajednici, a uz podršku asistenata.




U susret evropskim integracijama, ovaj način zbrinjavanja je tendencija i obaveza države, tako da je poželjno što prije omogućiti preduslove za razvoj i jačanje ovog sistema brige o osobama sa intelektualnim poteškoćama. Na sastanku se govorilo i o procesima deinstitucionalizacije, radu institucija koje trenutno zbrinjavaju osobe s invaliditetom, potrebnim edukacijama za osoblje tih institucija, te potrebi otvaranja servisnog centra na području HNK.

Govorilo se i o mjerama koje donosi novi Zakon o socijalnim uslugama FBiH, pojačanom nadzoru ministarstava nad pružanjem usluga predviđenih Zakonom, te unapređenju sektora.

VIŠE OD 500 UČENIKA/CA POHAĐALO RADIONICE PREVENCIJE TRGOVINE LJUDIMA

U februaru je završen projekt Prevencija u borbi protiv trgovine ljudima koji je realizovalo Udruženje žena „Derventa“.

Tokom realizacije inicijative organizovane su 22 radionice na temu prevencije trgovine ljudima koje je pohađalo više od 500 učenika/ca 9. razreda osnovnih škola u Derventi, Brodu, Prnjavoru i Doboju.



Učenici/e su prošli osnovnu preventivnu edukaciju i stekli znanja i vještine kako da prepoznaju žrtve trgovine ljudima, kome da se obrate u slučaju da svjedoče ili budu žrtve trgovine ljudima i kako da prenesu znanja svojim bližnjima o prevenciji trgovine ljudima;

Dodatne radionice za peer-edukatore prošlo je jedanaest učenika Savjeta učenika srednjih škola u Derventi i oni su sposobljeni za održavanje radionica sa svojim vršnjacima.

Realizovana je i kampanja “16 dana aktivizma žena” sa fokusom na prevenciju trgovine ženama u Brodu, Prnjavoru, Derventu, Podnovlju i Rudanki.

KAKO BANKARSKE USLUGE UČINI- TI PRISTUPAČNIJIM OSOBAMA SA INVALIDITETOM?

U Sarajevu je održan Okrugli sto „Problemi i poteškoće osoba sa invaliditetom pri korištenju bankarskih usluga u BiH“

Cilj je bio detektovati probleme i pronaći rješenja za svakodnevne prepreke sa kojima se suočavaju osobe sa invaliditetom.

Tokom okruglog stola na probleme su ukazali predstavnici osoba sa fizičkim invaliditetom, slijepih i



USAID
OD AMERIČKOG NARODA

slabovidnih, osoba sa intelektualnim teškoćama, te gluhih osoba.



Fizičke barijere na ulazima u poslovnice banaka, neprilagođeni šalteri i bankomati, te nedovoljno educirani uposlenici/e, samo su neki od problema o kojima su govorili predstavnici osoba sa invaliditetom.



„Banke žive i od nas kao i od drugih građana/ki, ali o nama ne brinu dovoljno“ – poručila je jedna od predstavnica osoba sa fizičkim invaliditetom. Kako je zaključeno tokom održavanja okruglog stola, zbog različitih poteškoća s kojima se susreću osobe s invaliditetom, potrebna su im i različita rješenja. Između ostalog, potrebno je i formirati tim predstavnika osoba s invaliditetom koji će za sve navedene probleme i poteškoće izraditi prijedlog rješenja, ocijeniti prioritete i realnost provedbe i to u saradnji s Agencijom za bankarstvo i drugim nadležnim državnim institucijama. Tim će sačinjavati predstavnici svih kategorija osoba s invaliditetom, koji dugi niz godina rade na rješavanju gorućih problema ove populacije.

U procesu pridruživanja Europskoj uniji važan segment je usklađivanje zakona, propisa i administrativnih odredbi država u pogledu zahtjeva za pristupačnost proizvoda i usluga među kojima su: bankarske usluge, internetske usluge, bankarske usluge na mobilnim uređajima, samouslužni terminali koji podrazumijevaju bankomate koji se upotrebljavaju za pružanje bankarskih usluga u cilju optimiziranja njihove upotrebe za osobe sa smanjenom funkcionalnom sposobnošću, uključujući i osobe s invaliditetom. Radi ovakvih odredbi udruženja se nadaju velikoj podršci institucija u rješavanju ovog pitanja s bankarskim sektorom.

Okrugli sto organizvalo je Udruženje slijepih Kantna Sarajevo, a uz podršku Programa podrške marginaliziranim grupama (USAID/PPMG).

ZAVRŠEN TRENING O TEMI PRAVNE I ORGANIZACIJSKE STRUKTURE



Trening o temi Pravne i organizacijske strukture održan u periodu od 21-23. februara 2017. godine u Sarajevu označio je početak novog ciklusa treninga za korisnike grantova čija je realizacija planirana do kraja maja 2017. godine. Trinaest predstavnika/ce organizacija iz različitih dijelova BiH koje se bore za prava, osnaživanje i dostojanstvo marginaliziranih grupa kao što su osobe sa invaliditetom i LGBT populacija su imali priliku upoznati se sa načinima izgradnje sistema pisanih politika i procedura, te zahtjevima zakonskih propisa, donatora i



USAID
OD AMERIČKOG NARODA

drugih interesnih grupa, a što će biti primjenjivo u njihovim organizacijama.

Udruženja, posebno novoosnovana, uglavnom ne posjeduju dovoljna znanja o načinima organiziranja i uspostavljanja internih pravila rada, a svijest o značaju ove tematike još uvijek nije na potrebnom nivou. Teme obrađivane na treningu - uloga Upravnog odbora, podjela nadležnosti između različitih organa udruženja, odnos između upravljačkih i izvršnih struktura organizacije, jasno definiranje pojmova vezanih za kreiranje politika i procedura, te načini kreiranja procedura – su, zapravo, ključna pitanja sa kojima se udruženja suočavaju svakodnevno. Upravo iz tog razloga ciklus treninga kojima se žele ojačati kapaciteti organizacija korisnica grantova je započeo sa temom koja predstavlja temelj za daljnji razvoj organizacija.

U sklopu treninga učesnici/ce su imali priliku prisustvovati i sesiji o temi Rodna ravnopravnost u kontekstu teme. Sesiju je vodila gđa Jadranka Miličević, predstavnik Fondacije CURE. Pitanja poput Zakona o ravnopravnosti spolova, povrede Zakona, te rodno odgovornog jezika kao načina prevladavanja diskriminacije u pravnim dokumentima, obrazovanju i medijima su bila jedna od ključnih za diskusiju o ugrađivanju gender mainstreaminga u profil jedne organizacije, a kako bi se osigurala promocija institucionalizacije rodne ravnopravnosti kroz kanale komunikacije, revizije i izvještavanja.



USAID - Program podrške marginaliziranim grupama (PPMG)

Program provodi Institut za razvoj mladih KULT
u partnerstvu sa NGO & BUSINESS AUDIT d.o.o.

Ul. 4. viteške brigade 34-36 • 71210 Ilidža • Bosna i Hercegovina

T: +387 33 778 766

F: +387 33 778 779

www.ppmg.ba